

Date – 19/06/2026
Time - 7:30 -7:40 Hrs
AKASHVANI AIZAW

REGIONAL NEWS BULLETIN

1. Mizoram aiawh tur Rajya Sabha MP thar atan ZPM Candidate Pu Khiangte Laltluangkima chu thlan tlin a ni.
2. Chief Minister Pu Lalduhoma chuan Department of Personnel & Administrative Reforms (DP&AR) chu a enkawl tawh dawn.
3. Prime Minister Narendra Modia chuan India chu ngaihtuahna thar leh technology lamah khawvel hmunpui anih thu a sawi.
4. National Testing Agency (NTA) chuan NEET UG 2026 exam tur zirlaite chu chia lo tur leh exam buatsaihtute ringtawk turin a chah.

<><><>

MP

Mizoram aiawh tur Rajya Sabha MP thar atan ZPM Candidate Pu Khiangte Laltluangkima chu thlan tlin a ni.

Akashvani News zawhna chhangin, thlan tlin a nih hnuah Pu Khiangte Laltluangkima chuan Pathian leh mipui zarah mai bakah sorkar thlawpna hnuaiiah mipui te tan theihtawp a chhuah dawn tih a sawi a, Mizoram sorkarin hmalakna lian tham leh hmachhawp a neih te a hlawhtlin ngei theih nan Delhi lama lo bawhzui chu a ngaihpawimawh a nih tur thu a sawi.

Pu Khiangte Laltluangkima hian Lok Sabha MP Richard Vanlalhmangaiha ang bawkin a thutna tur a chiang sa tawh tih a sawi a, vote thlak hunah chuan issue mil zela vote an thlak tur thu a sawi bawk a ni.

Election Commission of India (ECI) remruatnain nimin khan Mizoram Legislative Assembly-a MLA 40 zinga MLA 36 te chuan Mizoram aiawh tur Rajya Sabha MP hi Mizoram Legislative Assembly Secretariat Annexe building-ah an thlang a, tlai dar 5 khan vote tla te hi chhiar nghal a ni.

Returning Officer Pu Zothansanga Ralte chuan, Representation of the People Act, 1951, Section 66 leh Conduct of Election Rules, 1961, Rule 84, Sub-rule 1, Clause (a)-in thuneiha a pek angin, Pu Khiangte Laltluangkima chu a tling tih a puang a, kumin July ni 19-a MP member term tawp vanga hmun ruak lo awm tur hnawhkhat tur a ni tih a sawi bawk a ni.

Mizoram Rajya Sabha MP thlan thar Pu Khiangte Laltluangkima hian vote 26 hmu in, a khingpui MNF Candidate Zothansang Hmar chuan vote 10 a hmu thung a ni. Puan lan tawh angin tun tum MP inthlanah hian Mizoram BJP leh Congress te

chuan vote an thlak lo a, damlohna avangin ZPM MLA Pu W. Chhuanawma chuan vote a thlak thei lo bawka a ni.

Kum 63 mi Pu K. Lalitluangkima hi Saitualah a piang a, kum 1990 khan Pi Vanlalruati Khiangte nen inneiin, fa mipa pahnih leh hmeichhia pahnih an nei a, tunah hian Mission Veng, Aizawlah an cheng mek a ni.

Zirna lamah St. Anthony's College atangin Bachelor of Commerce a zo va, Trinity & All Saint College, Leeds atangin Christian Communication Studies a zo bawka. Maryland, USA atangin Master of Plumbing a zo leh a. Kum 12 chhung Synod Electronic Communication Department-ah Manager hna a thawk tawh a ni.

Kum 1997-ah khan MNF (N) tuna ZPM party ni ta hi a zawm a. CCF kaihhruiain kum 1998-ah khan Bilkhawthlir Bialah MLA candidate a lo ni tawh a. Tunah hian ZPM Party-ah Committee sang PAC Member Secretary leh Spokesperson nihna a chelh mek a ni.

<><><>

MI PRAGATI

Chief Minister Pu Lalduhoma kaihhruiain Mizoram Pro-Active Governance and Timely Implementation (Mi-PRAGATI) meeting vawi thumna CM Conference Hall-ah neih a ni.

Mi-PRAGATI hi state chhunga hmasawna hnathawh lian zualte vil a, harsatna an tawhte chin fel dan dappuitu leh a tul anga department hrang hrang thawhhona tichak tura din a ni a. Sorkar hnathawhte langtlang leh rang zawka kalpui zel dan ngaihtuatu committee thunei tak a ni.

Meeting-ah hian Home Minister Pu K. Sapdanga, EF & CC Minister Pu Lalthansanga, Supply Minister Pu B. LalchhanzovaPHE Minister Prof Lalnilawmabakah Chief Secretary Pu Khilli Ram Meena leh official pawimawh te an tel a ni.

<><><>

DP&AR

Chief Minister Pu Lalduhoma chuan Department of Personnel & Administrative Reforms (DP&AR) chu a enkawl tawh dawn.

Nizana Mizoram sorkar thuchhuah tarlan danin, Political & Cabinet Department Notification 08.12.2023 leh 24.03.2025 a tihchhuah te chu siamremin nimin khan notification thar tihchhuah a ni a. Mizoram Governor chuan Chief Minister Pu Lalduhoma chu DP&AR enkawl turin a ruat a ni.

DP&AR hi Pu K. Sapdanga department chan a ni thin a, tunah chuan Pu K. Sapdanga hian Home Department leh Urban Development & Poverty Alleviation Department te a la enkawl dawn a ni.

<><><>

MLDB

Mizo Language Development Board chuan nimin khan Mizo A, AW, B siam rem leh a kaihhnawih chungchanga Inrawn khawmna hun an hmang.

ATI Auditorium-a hun hmanah hian Mizo A AW B ah hawrawp belh emaw paih emaw neih tul an ti lova. 'Ng' chu 'H' hmaah ni lovin 'N' hnungah awm se. School zirilaibu chhut thar leh hunah pawh hman nghal tha an ti a. Mizo A AW B a 'G' leh 'J' lam rik dan chungchang chu ngun taka an sawiho hnuin chiang leh zuala zir leh phawt ni se tih a ni.

Mizo A AW B a 'G', 'J' leh 'O' atanga intan thumal a lem nena Pre-Primary leh Pawl 1 zirilai-a chart-a dah dan tur changchuang hi kalkhawm ten uluk taka an sawi ho hnuin lungtual taka pawm tlan an nei a ni.

<><><>

12 YRS OF NDA

Horticulture Department Farmer Award 2026 dawngtu zinga mi, Pu Lalbiaknunga, Darzo khua chuan sorkar laipuiin, Mission for Integrated Development of Horticulture (MIDH) leh Rashtriya Krishi Vikas Yojana- Per Drop More Crop (RKVY-PDMC) kaltlanga thlai chawmna tur bungraw hrang hrang a dawn te chu a hlawkpui hle tih a sawi.

Akashvani correspondent-in a kawmnaah Pu Lalbiaknunga chuan ser huan atanga bul tanin, kum 2020 khan Department of Horticulture puihna-in zikhlum te an ching tan a, hemi kum hian an la hlawhtling mai lova, a kum leh atangin an hlawhtling chho tan a, fur zikhlum an chin avangin a hralhna te pawh a tir lamah an hmu tha viau a ti a. Kum 2021 kum tawp lam atangin Horticulture Department kaltlangin sorkar laipui scheme MIDH leh RKVY-PDMC atangte in thlai chawmna tur- Water Storage Tank 2 unit siamsak a nih bakah, thlai chi, damdawi, leiṭha, Sprayer, Brush cutter, Mulch film, Green House bakah Drip Irrigation system hi Open, Greenhouse leh Serthlumah fit sak a ni tawh bawk a, a hmang tangkaiin a thlai tharna kawngah nasa takin a pui tih a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan India chu ngaihtuahna thar leh technology lamah khawvel hmunpui anih thu a sawi. Nizana Paris-a Vivatech 2026 Summit a hmanpuinaah he thu hi sawiin Pu Modia chuan mipui rorelna zulzuia kalpui anih chauhin technology chuan hmasawna a thlen thei a ti a. Pu Modia chuan khawvel huapa mithiam kalkhawmte chu India thawhpuih a sawm a. Kum 10 kalta chungin India chuan hmasawna nasa tak a thlen tih sawiin hei hi technology thiltihtheihna anih thu a sawi a ni.

Prime Minister Modia hian sumdawng hotu hrang hrangte kawmin India leh France ten sumdawna lam leh thilsiamchhuah lama an thawhdunna tihchak lehzual dan turte a sawipui bawk a ni.

<><><>

NTA

National Testing Agency (NTA) chuan NEET UG 2026 exam tur zirlaite chu chia i lo tur leh exam buatsaihtute ringtaw k turin a chah. NTA chuan exam ni atan ni thum chia h a awm taw h thu sawiin zirlaite chu kumtluana inbuatsaih an ni tih sawiin tunah chuan exam atan an theihtawp chhuah turin a chah a. Venhimna khauh tak kalpui anih thu sawiin NTA chuan exam dik, thianghlim leh langtlang tak an buatsaih dawn tih an sawi.

<><><>

WORLD CUP

FIFA World Cup 2026 chu Group match khel h chhunzawm zel a ni a, nizan khan Group A ten an match pahnihna khelin Czechia leh South Africa te chu goal khat ve ve khungin an inhnehtaw k.

Group B inkhelah Switerland chuan goal li goal khatin Bosnia an sawp a, inkhel dangah World Cup thlengt u ram pathum zinga pakhat Canada chuan si ruk faiin Qatar an hneh baw k a ni.

Tukin hian Mexico leh Korea te an inkhel me k a, chanchin thar puan lai hian result kan hre hman lo a ni.

<><><>